

LU MEGGHIU PARTITU

Secunnu tia, qual'è lu megghiu partitu?
Oggi lu partitu Comunista,
No, Demucraticu Cristianu, Socialista,
No, Republicanu, Pagnuttista.
C'è l'ideali di li donni,
Scriviti a lu partitu reggipettu,
Ti manteni lingua e dialettu
E teni nforma tutti li culonni.

Và forti in tutti li Nazioni,
Reggi la destra, reggi la sinistra
E si sbatti lingua cu sistema praticu,
Ti reggi puru lu centru demucraticu!

LA FIMMINA MPANTALUNI

La fimmina chi porta u pantaluni,
È comu un faru di luci, nvirtùtu.
Ncasa pari la mogghi o lu marìtu?
È fimmina nurmali o capilluni?
Cci poi pigghiari cunuscenza,
Taliannucci li formi, la spurgenza
Ma cu stu tagghiu di cappotti fattu a trusci,
Lu sessu spissu si scunusci!

Sti modi bisogna rifurmarli,
Li cosi nun caminanu nurmali.
Pi canuscisi prestu, abitarli!
Sti modi bisogna trasfurmarli!
Li picciotti lanciaru un manifestu:
Di tucari i tasti, pi canuscisi cchiù prestu!

RISALTU DI LA MINIGONNA

Passannu na signurina mminigonna,
L'omu si senti tuttu, tramazzari,
Si agita, s'illudi, si frastorna,
Guardannula resta a cuntimplari.
Guarda la gamma, s'è torta, s'è dritta,
S'è conica, s'è grossa oppuru è fina,
Di sutta lu carcagnu a la vistina,
Nda ddu mumentu pari chi la pitta.

Dopu chi la donna è già passata,
Raccunta a l'amicu l'avvintura
Dicennu: Caru meu, ch'era ntrunata!
Sai, era vistuta mezza nura!
Si vitti la bedda gamma spinlungata,
Era un gioiellu, era na pittura!
A forza di parlari, bedda o brutta,
Ristau cu l'occhi chini e bucca asciutta!

LA CASA DI LA FURTUNA

La casa veni fatta chi cantuna,
Preu Diu chi la vulissi sempri sana,
La spada di lu rizzu sù li spuntuna,
La cuperta di lu crastu esti la lana,
Lu vurgu è fattu pi la cufuruna,
Pi la serpi, la buffa e la giurana,
La casa, di la sorti e la furtuna,
È d'un crastu, d'un mulu e d'un figghiu di buttana!

CARI L'INGANNU SUPRA L'INGANNATURI

Lu munnu è tuttu mbrogghiu, miu Signuri,
Iò sula ci nascivi sfurtunata,
Pi a un picciottu farici un favuri,
Virìti la panza mia, quant'è vvunciata?
Cci avìa granni affettu, granni amuri,
Ivi pi ngannari e fui ngannata
E iddu, birbanti, falsu e tradituri,
Cca, sula mi lassau, mmezzu la strata.

Si miritassi la testa scacciata,
Cu na mazza grossa vinti chila,
Supra ddu puntu, dunnì fui spugghiata,
Supra ddu stricaturi di dda pila.
E quannu chi sutta mi appi cullucata
Dissi: Ora ti lu mparu iò comu si fila!
All'alba la risposta mi fu data:
Cu prima nun penza all'ultimu su spila!

Quannu la panza cuminciau a vvunciari,
Me patri s'innadduna e fora mammutta
Dicennu: L'avviriri tu dunnì a ngucciari
E senza vutariti cchiù, cusazza brutta!
Una vecchia mi vinni a dumannari
E iò la virità ci dissi, tutta.
Dda vecchia mi dissi: Figghia, mà scusari,
Siddu eri onesta nun ti mittivi sutta!

Viri ora a chi puntu si ridutta,
Donna senza cuntegnu nè russuri?
Viri quantu custau mettiti sutta?
Ristati senza maritu e senza onuri!
Tu, ti criri semplici e asciutta?
Dici chi l'omu è falsu e tradituri?
Ora ti chiami fimmina currutta
E cari l'ingannu su l'ingannaturi!

NA CAMPAGNULEDDA

Cicciu, chi passa la Madonna?
Viu tutta la genti chi talìa.
Zu Peppi na signurina mminigonna,
Li picciotti fannu vuccirìa.
Cicciu, un pari chi nn'agghiorna,
Cu sti visteddi a fissarìa?
Ni vitti una, avrà na para iorna,
Puru la ngingaghia ci virìa!

L'otra vota a na campagnuledda,
Giniali, simpatica, graziusa,
Li gammi l'avìa un pocu a cantedda,
La vesta curta, si facià curiusa,
Caminannu cci carìu la borsa.
Si vota, si calau tutta cunfusa,
Ma quattru picciuttazza marpiuna,
Nta dui irita di sfilazzedda,
Vittiru San Marcu, Paparedda,
La lampada di lu cassaru addumata,
Lu ndirizzu, lu numaru, la strata.

L'ARCHITETTI DECRETARU

Vi parlu di li casteddi antichi
Chi hannu li mura culussali,
Cu finestri e pirtusa nichì nichì,
Sagumati cu vultini riali.
Oggi diventanu palichi
Cu sta granni apirtura ginirali.
Cchiù nun mostra la fimmina a lu cumpagnu,
La vesta longa finu a lu carcagnu.

Oggi lu finistruni è na marina!
Fineru li pirtusidda a pirsiana
E quannu affaccia qualchi signurina,
Cu trasparenza e senza la sottana,
Mustra l'arcu di Santa Catarina,
La lampada addumata, la campana.
Chista è la civiltà chi si ncamina
A carattiri naziunali e a la Svezziana!

La civiltà nun si ferma ddocu,
La civiltà v'è sempri a avanzari,
È na binzina chi pigghiau focu!
Cu ci v'è davanti p'astutari?
Acqua, ventu, nivi, dacci locu!
Sta giuvintù va sempri a bruciari,
Brucia di la matina a quannu scura,
Mmezzu lu quadru di la ncurniciatura!

Teresa, appena scura, pianu pianu,
Si passa la notti in via Castelvetranu,
Lilla, Gesualda e Catarina,
Isanu la vesta, darrè la casina,
Rosa è allitrata, ci stà un mumentu,
Apri lu registru, supra a cincuentu,
Narda è casalinga, cerca maritu,
Tira marchetti mmezzu lu cannitu.

Nun c'è cchiù distinzioni, tali e quali,
Qualcunu chi cuntrasta lu prugressu,
Soffri e si cunserva la murali,
Facennusi li divirtuti a contru sessu.
E si ddamu n'occhiatina a lu giornali,
Fimmini e fimmini brucianu lu stessu
E tra mini, bitt e pacchianella,
Spunta l'omu vistutu a fimminella!

Pi cchistu l'architetti decretaru
La liggi costruzioni, per iscrittu,
Allargari porti, finistruna
E d'aisari ancora lu suffittu,
Chi cu tutta sta civiltà chi v'è avanzannu,
Sa quantu razzi di corna spuntirannu!

LA SCIARRA DI LI SCECCHI

Vitti na sciarra mmezzu lu stratùni,
Di un sceccu griggiu e n' autru russia,
Lu griggiu, misu avìa lu capizzuni
E l' autru sceccu cci strincìa lu mussu,
Unni diciànu dda, tanti pirsuni,
Sta sciarra cuminciau senza discursu
E cchiù chi taliatu, si virìa,
Cchiù assai, lu sceccu russia ncarmalia.

Un viddanu, chi la sciarra si virìa,
Scarvaca la mula sua e ci ncugna a latu
Dicennu: Nun mi sembra papparìa
Chi un sceccu è asciotu e l' autru mpaiatu!
Mpaianu stautru sceccu, cci dicìa,
Cun capizzuni, beddu rinfurzatu,
Quantunqui chi un sceccu russia è na putenza,
Di tutti dui scecchi nun ci fazzu diffirenza!

Fra tuttu stu rumuri, stu fracassu
E tutta sta gran timpesta di lignati,
Tanti picciotti vinniru, d' arrassu,
Pi sti dui scecchi viriri affirradi.
Pi ddi picciotti cumunciau lu spassu,
Facennuci fisca e pirità ncucchiati,

Mentri ci rispusi mastru Piddu:
Si chiddu è sceccu, tu cchiù sceccu d'iddu!
Sta tali farsa di Minicu Cacu
Fu fatta pi rammintari a Don Iacu.

OSSIGGINU DI MUNTAGNA

A Lisa, la visitau lu dutturi,
Ossigginu cci voli, di muntagna,
È seria, nun ammetti la macagna,
Stà attaccata a lu sò caru amuri,
Nun ha suffertu mai, u raffridduri,
Lu medicu ci detti un bon cunsigghiu,
Sei anni maritata, nunn'havi un figghiu,
Vintisei anni, è un lucumuturi.

So maritu nun ci la po purtari,
È stancu, mpignatu di lavori,
Si fà l'acchiana e scinni, prestu mori.
Putissi accumpagnarla so cumpari.
L'annu scorsu, la mogghi d'un mpiatu,
L'accumpagnava so cumpari Liddu,
Dopu novi misi e deci iorna,
Purtau a la luci un beddu picciriddu!

LU BASTARDU

Ora chi ti canusciu, scrivu allura,
Di la tò riscinnenza e la tò schiatta,
Vol diri nasciri tu, fu cugnintura,
La semi chi fici a tìa, nun fu cumpatta.
Fu di n'anticchia l'unu, la misura,
Essennu di tanti, nun pigghiau esatta.
Accussì, ti scrivu bastardu, pi natura,
Ed essennu bastardu, hai la cuda chiatta!